

LA PRIMERA CARTA DEL APÓSTOL SAN PABLO A LOS TESALONICENSES

**Pablo y sus compañeros escriben
a la iglesia de Tesalónica**

1 Nugö, dúr Pablo, dí yojme car Silvano co car Timoteo. Nugöje dí penquije nar carta-ná, nuquejü, um hñohuiquijü, gár bbupjü pü jar jñini Tesalónica. Xcú hñemejü ca Ocja co cam Tzi Jmujü Jesucristo. Guegue cam Tzi Tajü pü jítzi co ni car tzi Jesucristo da ddahquijü bendición cja da möxquijü pa gui hmupjü rá zö.

**El ejemplo de fe que daban
los de Tesalónica**

2 Göhtjo ur pa dí öjpi mpöjce cam Tzi Tajü pü jítzi por rá nguehquejü, göhtjoquiguejü. Dí mbenquigöje cada bbü dar oraje. **3** Cada bbü dar oraje, dí nõmbiquije quir tjujü, dí mbembije cam Tzi Tajü jítzi pa da möxquijü. Por digue ca guí øtijü, dí padije, guí emejü car Jesucristo, göhtjo mbo ir tzi muyü, cja guí madijü-ca. Guejtjo dí mbenijü, jin guí xü ir muyü. Segue guí tenijü cja guí tzejtijü göhtjo ca i ttøjtiquijü, porque guí tøhmijü car pa bbü pé xtu eh cam Tzi Jmujü Jesucristo. **4** Nuquiguejü,

um cjuadaquijü, dí padije ca Ocja xí juanquijü pa dí mejtiquijü guegue, guejtjo i mahquijü. **5** Porque bbü ndú xihquije car tzi ddadyo jña, jí mí gue cam mfenitsjeje cü palabra cü dú majme, pe ndí yojme cár tzi Espíritu ca Ocja, cár ttzedi guegue-ca mí föxcöje, cja ndí padije mí ntjumuy ca ndí majme. Nuquiguejü, guí padijü rá zö ja mí ncja cam vidaje bbü ndár bbupjü. Ndí jon car manera ja guá föxquijü.

6 Nuquiguejü, gú tenijü ca ndí ujtiquijü, guejtjo gú tenijü car ejemplo ca bi zogüigöjü cam Tzi Jmujü Jesús. Gú hñemejü cár tzi palabra ca Ocja cja gú tenijü cor pöjö, masque mí ndo uquijü cü cjahni. Pe ndejmä gú mpöjmü, como mí föxquijü car Tzi Espíritu Santo. **7** Eso, xcú unijü hnar ejemplo pa da deni göhtjo cü hermano pü jar estado Macedonia, pü jabü gár bbupjü, co hñecua jar estado Acaya. **8** Cja ya xí ntungui car tzi ddadyo jña göhtjo cü lugar-ca. Guehquejü, xcú xijmü göhtjo cü cjahni cár palabra cam Tzi Jmujü. Ya xqui ndo fah pü Macedonia, hñecua Acaya. Guejti cü cjahni cü i bbü göhtjo cü pe dda lugar, ya

xí dyøde diguehquejü ja ncja xquí hñemejü ca Ocja. Göhtjo pü jabu dí pa dár nzoj yu cjahni, ya xí dyøde, xcú hñemejü nür evangelio. ⁹Cü cjahni cü to gua xijme, guegue-cü i xijquije ja ncja dá cutije pü jabu guí bbüpju cja ja dá nzohquije pa güi hñemejü ca Ocja, cja nuquejü, gü recibiguje rá zö. Cja pé i xijquije ja ncja guí pötiju ca nguí emejü hneje. Gü jiejmü cü ídolo cü nguí tenijü mahmeto, cja gü hñemejü ca Ocja ca ntjumüy i bbüy. ¹⁰Guejtjo i xijquije cü cjahni, nuquiguejü, ya xquí tømijü cár tzi Ttu ca Ocja. Yu pa ya, guegue-ca bí bbüh pü jítzi, pe du yojpi du ecua jar jöy. Guegue-ca ya xquí du, nu ca Ocja bi xotzi, pé bi cjaipi bi jña úr jña. Guegue car tzi Jesús ya xí nguzquigöjü car castigo rá ndo nttzo ca ya xpa eje, pa ya jin gu tzögöjü-ca.

El trabajo de Pablo en Tesalónica

2 Nuguejü, üm cjuadaquijü, guí padijü bi jogui cja bi bñni rá zö bbü ndú cutije pü jabu guí bbüpju cja ndú xihquije cár palabra ca Ocja. ²Nuquejü, guí mbenijü hneje ja ncja ndrú sufrebbe bbü ndrú bbübbe pü jar jñini Filipo, nugö co car hermano Silvano. Bú ndo ttünguibe cja bú hmetigui üm tzöbbe. Cja bbü ndú pønibbe pü, pé dá mebbe pü jabu grá bbüpju. Nu ca Ocja pé bi ddajquibbe cam ttzedibbe pa dú xihquibbe car tzi ddadyo jña. Dú purabbe, dú xihquibbe rá zö, jin dá ntzübbe, macja pé mí cja jueni cja pé mí ttöjtiguibe tujni por rá ngue nür evangelio. ³Nuquejü, guí

padijü, jin gur bbetjri car mensaje ca xtú xihquijü. Jí xtá nquivocaje ca xtá emegöje nür evangelio, cja göhtjo pü jabu dí xijme yu cjahni nür evangelio, dí xijme ca ncjuani. Nim pa to dí øhtibitjoje ntjöti. Guejtjo jin di jongöje ja grá cjaipije yu cjahni pa da ddajquije domi. ⁴Guejtsje ca Ocja bi nzojquigö pa gu xij yu cjahni nür palabra guegue, cja i pa guegue, dí xij-yá nür palabra rá zö nü dí emejü, como dí mbeni ja ncja gu øti cam bbefi pa da tzøh ca Ocja. Jin dí jongö car manera ja gár johtitjo yu cjahni pa da dengui. ⁵Guejtjo guí padijü, nugö, jin dá xihquijü palabra gá ntjöti pa güi hñemejü ca ndí ma. Nugöbbe, jin dá jojtiquitjoje cja jin dá jonibbe car manera pa güi ddajquibbe domi. Bí janti ca Ocja cierto nü dí ma. ⁶Guejtjo jin dá jongö ja gua ncjabbe pa di hñizquigöbbe cü cjahni, ni diguehquejü ni digue cü pe dda cjahni, masque mír ntzöhui di ttizquigö, hneje. úr jmandaderoguigö car Cristo, como guegue-ca bi hñixquigö gá apóstole. ⁷Nugö, jin dá hñixtsje. Jin dá hmüy ncjahmü dir lamogöjü. Ndí núquijü cor ttijqui ncja hnar bbejña ca i nú quí bajtzi. ⁸Ndí ndo mahquijü, cja ndí ne gua dé gua üjtiquijü cár tzi palabra ca Ocja. Bbü di nesta, gua döjmaja cam vida pa gua föxquijü. ⁹Nuquejü, cjuada, guí mbenijü ja ncja ndí pebbe pá úr xuy pa gua pehtzibbe te gua tzibbe cja pa pé di ttajquibbe lugar gua üjtiquijü cár palabra ca Ocja. Jí ndí ne pa to di wüinguitjobbe gá grati. ¹⁰Nuquejü, como ngu xquí hñemejü car tzi ddadyo jña, gü

ccahtijü ja mí ncja cam vidagö bbü ndár bbüjü pü Tesalónica. Gú cjaü ncja ngu testigo. Guejtjo bí janti ca Ocja, már tzi limpio cam vidagö. Jin to te ndí tujpi cja jí mí tzö to di queja, xcrü øhtibi ca rá nttzo.

¹¹Ndí jujtiqui quir tzi müyju, cja ndí ddahquijü car hñü, ngu-hnaa ngu-hnaa. Dú nzohquijü ncja hnar ta ga nzoh quí bajtzi. ¹²Segue ndí xihquijü ja da ncja grí hmüpju, como ya xquí cjaü í bajtziquijü ca Ocja. Guegue xí nzohquijü pa gui tenijü car Jesucristo cja gui cutijü pü jabü bí bbüy, pü jabü rá tzi zö, cja gui ccahtibijü cár tzi tjay.

¹³Eso, bbü dí oraje, segue dí øjpije mpöjce ca Ocja por rá nguehquejü. Porque bbü ngu dyødeju car mensaje ca dú xihquijü, gú meyajü güi hñeh ca Ocja. Gú padijü, i ntjumüy car palabra-cá, cja jin gú majmü dúr palabra tema cjahnitjo. Eso gú hñemeju, cja hasta rá pa ya, i fadi, rá nzeh cár palabra ca Ocja, como xí pötiqui quir vidaju.

¹⁴Nuqueju, pé xí ncjahquijü ncja ngu gá ncjajpi cum cjahnije cu rá bbüh pü Judea, tzüdi, cu israelita cu bi hñeme nür evangelio. Guegue-cü, ca gá hñemeju car Jesucristo, cu pe dda judio cu rá bbüh pü bi ndo unijü. Hñehquigüeju, xí ndo unquijü hneje quir mingüju. ¹⁵Mí gue cum cjahniçöje, cu judio, cu jí mí ne di hñeme cam Tzi Jmuju Jesús. Mí øtijü ncja ngu nguá dyøti cu ndo í titaju. Guejti guegue-cü bi möhti cu jmandadero cu mbá pejni ca Ocja. Cü pá cu cja xí tjogui, cum minga-judioje cu jin gui eme mbá tønçaddijigöje, como ndí xijme cu cjahni cár palabra ca

Ocja. Guegue-cü, segue i cjaipijü da zøti úr müy ca Ocja, cja i üju göhtjo cu pe dda cjahni cu jin gui ten cár religiön guegueju. ¹⁶Nugöje, dí ne gu nzojme cu cjahni cu jin gui judio, gue cu jin gui padijü ja i ncja ca Ocja. Dí ne gu nzojme-cü, pa da dötijü car nzajqui ca jin da tjegue. Nu cu judio cu jin gui eme nür evangelio, jin gui ne da jægüi gu nzoh cu pe dda cjahni. Guegueju desde ya má yabbü xí ntøxtihui ca Ocja, cja nuya, más rá ndo nttzo ca xí dyøhtibijü. Cü cjeja rá ngu cu xí tjogui, ca Ocja xí ndo mehtzibi paciencia, pe nuya, ya xí nzüh car castigo ca mír ntzøhui di ttunijü. Rá ndo nttzo car castigo-cá.

Pablo desea visitar otra vez a los de Tesalónica

¹⁷Nuquigüeju cjuada, bbü ya xquí tzi cja mpa ca xtá wegüeju, ndí ndo mbenquijü, cja ndí jonquijü. Ndí ndo ne pé gua nccahtijü pa pé gua ñaju. Masque ya xtá pøngö pü jabü grá bbüjü, ncjahmü nguí bbütijü jam tzi müygö. ¹⁸Nugö, dúr Pablo, dú jon car manera tengü vez ja guá ma pü, pa gua ccajtiquijü tzü. Nu ca Jin Gui Jo bi ccaxquigö, eso, jin gá jogüi gua magö pü.

¹⁹⁻²⁰Nuquigüeju, dí mpöjce bbü dí mbenquijü, cja dí tzi hñixtsje hneje, ncjahmü um bajtziquijü. Cja dí tømhi car pa bbü pé xtu eh cam Tzi Jmuju Jesucristo, santä gu döquijü jár tzi dye, cja guegue da xijqui xtü pejpi rá zö. Ca guí hñemeju bbü ndü nzohquijü, guehcá da jñejmi cam tjajagö. Guehcá da pöjpiçüi nüm tzi müy.

3 ¹⁻²Diguebbü ya, bbü ya xquí tzi cja mpa ca xtá pøngö pü,

cja jin te ndí ødebbe diguehquejü, ya jin dá jöti pé gua tøhmi di zø tema razón. Cjuá ndí ne gua padi te ngár pejmu. Eso, dú mbeni dú cüh car Timoteo, bi ma bú ccajtiquijü, cja nugö dü tøhmitsje pü Atenas, masque ndí ndo ne gua matsje pü jabu gár bbupju. Car tzi hermano Timoteo mí föxquigö ca ndár pejpi ca Ocja, ndí tunguibbe car tzi ddadyo jña, ndí xibbe cü cjahni ja i ncja car Jesucristo. Ncjarü dá cüh car Timoteo pa di jojtiquijü quir tzi møyju cja pa di nzohquijü, segue güi hñemejü. ³Dú bbejpi guegue di xihquijü, jin to di dyuxi ür møy por rá nguca mir ttøjtiquijü tujni. Como ya xquí padijü, yu to da den car Jesucristo, i nesta da sufriju. ⁴Nugö, bbü ndár bbajtigö pü Tesalónica, cja jin te bbe mí ncja, dú xihquijü di ttøjtiquijü tujni, cja nuya, ya xcü ccahtijü ca dú xihquijü. Ya xí ncja. ⁵Diguebbü ya, bbü ndü øde, ya xi ngár sufriju pü, dú ndo mbenquijü, ndí ndo ne gua padi ¿cja nguí emetjoju? Eso, dú pejni cam cjuadaju Timoteo pa pé di jñanqui razón. Como ndí ntzu, ¿xi bbü ya xtrü jiøhquijü ca Jin Gui Jo cja ya xcrü jiejmü ca xquí hñemejü car Jesucristo? Ndí tzugö, más xquí bbeh cam bbefi, tzadi, ca xtá xihquijü cár palabra ca Ocja.

⁶Pe nuya, ca xcá nzøh car Timoteo, xcuá hñeh pü Tesalónica, pü jabu guí bbupju, xí xijqui, guí emetjoju, cja guí madijü car Jesucristo, guejtjo segue guí mbenguitjogöju cor jmajte. Guí ne guí ccajtiguitjoju ncja ngugügö, dí ne gu ccajtiquijü hneje. ⁷Nuya, cjuada, ya xí jñü üm møygö,

como xí tsijiqui guí emetjoju nar evangelio. Ncjahmu pé xtü ja üm jña, masque nugöje como ngu dar hmæpje hua, guejtjo dí sufrije, dí tjojme trabajo. ⁸Pe ndejma dí bbü rá zø bbü guí segue guí tenijü cam Tzi Jmujü Jesús, como jin gár hmeditjo cam bbefi bbü. ⁹Car hora ca dí nzoh ca Ocja, dí mbenquigöju, cja i ndo mpöj num tzi møy. Dí ndo øjpi mpöjce por rá nguèhquigüeju. ¹⁰Pa ur xuy dí nzoh ca Ocja göhtjo mbo üm møy. Dí øjpi da jieguigö pé gu má ccajtiquijü cja gu föxquijü, pa gui hñemejü rá zø, bbü te di tzi bbetiquijü.

¹¹Guejtsje cam Tzi Tajü pü jitzi co ni cam Tzi Jmujü Jesucristo da gæzqui cü estorbo cü i ccaxquigö cja da zixqui pa gu ma pü jabu gár bbupju. ¹²Hnehquigüeju, da möxquigüeju hneje cam Tzi Jmujü pa más drá ngu gui majtsjeju, göhtjoquigüeju como ngu xquí hñemejü. Nugöje, dí mahquigöje göhtjo mbo üm møyje, cja dí øjpi ca Ocja da möxquigüeju pa gui madijü göhtjo yu cjahni, ncja ngu dar mahquijü. ¹³Guegue cam Tzi Jmujü da zetiqui quir tzi møyju pa jin te gri tujü ca drá nttzo car pa bbü xcri ntjeju ca Ocja, cam Tzi Tajü jitzi. Gu ntjeju-ca bbü pé xtu eh cam Tzi Jmujü Jesús, du yojmi göhtjo quí cjahni cü xí hñemejü.

La vida que agrada a Dios

4 üm tzi hñohuiquijü, pé i bbajtj tengü tzi palabra dí ne gu xihquijü. Como ya xcü hñemejü cam Tzi Jmujü Jesucristo, dí nzohquijü cja dí xihquijü tzu, gui hñoju rá zø. Ya xtü ujtiquijü ja ncja

grí hmupjə pa da tzøh ca Ocja. Cja nuya, pé dí xihquijə tzə, gui segue gui dyøtijə ncjapə, pa más da joh quir vidajə.

²Nugö, dí ja cam cargo ca xí ddajqui car Tzi Ta Jesús, cja nuquejə, ya xquí padijə ter beh ca dú bbejpíquijə. ³I ne ca Ocja nxøgue dur tzi limpio quir vidajə, como rí ntzøhui quí bajtzi guegue. I ccaxquijə pa jin da hməbi hnar hñøø co hnar bbejñə ca jí xtrú ntjajtihui. Jøntsje hnar hñøø co hnar bbejñə cə xí ntjajtihui, nucú, da mpejni-cə. ⁴Nuquejə, guí hñøøjə, cada hnaaquiguejə gui juajnijə ja ndrə ngueh car bbejñə da gustaquí, gui ntjajtihui cja gui nu rá zö, ncja ngu ga ne ca Ocja, cja jøñə guegue gui mpejnihui. ⁵Jin gui hna mbenijə nttzomfeni pa gui jñøjmi tema bbejñə ca guí nedijə. I øti ncjapə cə cjahni cə jin gui tzú ca Ocja. Pe nuquejə, ya jin gui ncjajə pə. ⁶Guejtjo gui jñajə Ƴr huenda, jin to da jñøhtibi Ƴr bbejñə pe hnar hñøø. Ya xtú xihquijə məhmeto, cja pé dí xihquijə ya, ca Ocja da castiga car cjahni ca da dyøti-ca. ⁷Como guegue ca Ocja xí nzojquijə, xí cjagui í mejtiguijə pa gu hmupjə hnar vida rá zö cja ya jin gu øtijə cosa rá nttzo. ⁸Car cjahni ca jin da ne da dyøjti nar palabra nə dí mə, jin gui jønguitsjegö i despreciagui nəm palabra. Guejtsje ca Ocja i despreciabi nár palabra hneje, como rí hñe guegue nar jmandado nə xtú xihquijə. Ca Ocja xí ddajcøjə cár Tzi Espíritu pa gu yojmə-ca. Como rá nttzujpi car Espíritu Santo, i nesta dur limpio Ƴm vidajə hneje.

⁹Ƴh cjahni Ƴh xí hñeme, rí ntzøhui da məh cə pe dda hermano.

Nuquejə, jin guí nesta gu xihquijə gui dyøtijə-ca, como ya xí Ƴjtiquijə ca Ocja ja ncja gri majtsjejə, guí göhtjøjə. ¹⁰Guejtjo guí madijə göhtjo cə hñohui cə rá bbəh pə Macedonia hneje. Pe ndejmə dí nzohquijə, Ƴm cjuadaquijə, dí xihquijə gui seguejə gui ncjajə pə, pa más gui ndo majtejə hneje. ¹¹Cja gui ntzohmijə ja grí hmupjə rá zö, gui mprevenijə ca te guí nestajə. Jin gui ma gui pejni yir dyejə, o gui dyəxti yir ñajmujə. Cada hnaa da peh cár bbefi, ncja ngu dú bbejpíquijə. ¹²Gui mpeguijə gui pejmə pa jin te da faltaquijə, cja pa da respetaquijə cə cjahni cə jin gui eme.

La venida del Señor

¹³Guejtjo hneje, Ƴm cjuadaquijə, dí neje pa gui padijə ja xcá ncja cə hermano cə xí ndu, pa jin gui duməyjə ncja cə ddaa cə jin gui emejə car Jesucristo, como nucú, jin gui tøhmi pé drí ntjehui quí ánimajə bbə pé xtu eh cam Tzi Jmujə. ¹⁴Nugøjə, dí emejə, bi du car Jesús cja pé bi jñə Ƴr jñə. Guejtjo hneje dí emejə, ca Ocja da xox cə cjahni cə ya xquí hñemejə car Jesús bbə mí dujə. Bbə pé xtu co guegue-ca, da nantzi-cə, ncja ngu gá nantzi car Jesús.

¹⁵Nar palabra nə gu xihquijə ya, bi zogüigøjə cam Tzi Jmujə Jesús. I bbəh cə dda hermano xta huetijə hasta bbə pé xtu e guegue. Nu cə hermano cə jim pé di tų, jin da dapi cə xtrú ndu pa drí ntjehui car Jesucristo. Parejo da ntjehui guegue göhtjo cə xí hñeme, ncja ngu cə dí bbajtjo, ncja ngu cə ya xtúr ndu.

¹⁶Guejtsje cam Tzi Jmujə Jesús du cə jar jitzı, da ndo majtigiujə nzajqui. Cja gu ɔjmu, da tjuxtigiujə hnar trompeta, cja da ndo mafi ca hnar ángele ca más i mandado. Xtrı gah car Jesucristo, xtrı nantzi cə ánima cə xquí hñeme guegue. Da hmeto da nantzi-cú. ¹⁷Ma ya, göhtjoguigöjə cə tengu xcrú huetijə hasta car pa-ca, gu hna bbejtijə hua jar jöy, gu mpejnijə cə ánima cə xtrı nantzi, gu ma guır ntjeje car Cristo nə jabə bí cax yə guy. Ncjapə gu hməpjə guegue göhtjo ər tiempo. ¹⁸Nuquejə hermano, dyo guı dımuyjə por rá ngue cə hermano cə xí ndu. Gui mbenijə, guejti-cə, da zix car Jesús bbə xtu eje. Eso, rı ntzöhui da jñu ir muyjə.

5 Nuquiguejə cjuada, jin gui nesta gu xihquijə ncjahmu du ɛh car Jesucristo o te da ncja bbə xtu ɛ guegue. ²Porque ya xquí padijə, jin gui fadi ncjahmu mero du eje. Du hna ɛtjo ncja hnar be bbə nxuy. ³Cja bbə xta man yə cjahni: “Dı bbəpjə rá zö ya, ya jin te gu ccahtijə ya,” nubbá, da hna zəh car castigo. Cə cjahni cə jin gui ɛme, da ncjajə ncja ngu hnar bbejñə ca i hñu. Bbə xí nzøh car pá, i hna jñintjo. Da ncjadipə guegue-cə, da hna zujti cár castigojə cja jin da huetijə. ⁴Pe nuquejə, ım cjuadaquijə, ya jin guı bbəpjə jar bbexuy, pa jin da hna zəhquijə car pa-ca ncja hnar be. ⁵Nuquiguejə, como xcú cuatijə jár dye car Cristo, guı bbəpjə jár jiahtzi ca Ocja cja guegue xí yoti mbo quir tzi muyjə. Nugöjə, ya jin dí bbəpjə jar bbexuy. Ya jí í mejtigiujə ca Jin Gui Jo. ⁶Como ya xtú pønijə jar

bbexuy, ya jin gu ncjajə ncja ngu cə cjahni cə i cojti pə. Como ya xtı padijə, pé du ɛh car Cristo, gu mbenijə-ca cja gu jajə ər huenda pa jin da jiöjquijə cə costumbre rá nttzo cə ndı tenijə máhmeto. ⁷Cə cjahni cə i bbujti jar bbexuy, jin gui ntzohmijə te i ne ca Ocja. I jñeguijə da dapi quı nttzomfeni cə i mbenijə. I ncjajə ncja ngu cə tı, como jin gui mbenijə ja drı hməpjə pa da tzøh ca Ocja. ⁸Pe nugöjə, ca ya xtár hməpjə jar jiahtzi, i nesta gu mfödijə ncja sundado. Nucá, i tzödijə pa jin da hna zəh cár contrajə. Gu segue gu ɛmejə car Jesucristo, cja gu majtejə. Guejtjo gu tøhmijə car pa bbə pé xtu ɛh car Cristo pa da ddajquijə car nzajqui ca jin da tjegue. Bbə gu hməpjə ncjapə, jin da daguigöjə ca rá nttzo. Gu ncjajə ncja ngu cə sundado cə i je hnar pajni gá ttəgui cja i juxi hnar fuy gá ttəgui hneje, pa jin da tjohti cár møy o cár ñə bbə to di ccajni. ⁹Ca Ocja xí juajnquigöjə cja xí nzojquigöjə pa gu hməpjə guegue pə jar jiahtzi. Como xtú ɛmejə cam Tzi Jmujə Jesucristo, ya jin da zujquijə car castigo ca da zəh cə pe dda cjahni. ¹⁰Guegue car Jesucristo bi du por rá nguejcöjə, bi cjagui í mejtigiujə. Nuya xí jogui pa gu hməpjə guegue göhtjo ər tiempo. Bbə da ncjadi ım nzajquijə bbə pé xtu ɛ guegue, nubbá, da zixcöjə. Guejtjo bbə ya xcrú tugöjə, ndejmə da xoxcöjə cja da zixcöjə hneje. Göhtjoguigöjə parejo drı zixcöjə pa gu hməpjə guegue pə jar jitzı. ¹¹Nuquejə, ya xquí nzojtsjeje pa grı zedijə. Cja nuya dí xihquijə gu segue gui dyötijə ncjapə, cja

gui mbenijü nür palabra nū xtü xihquijü pa jin gui dümüyü.

Pablo aconseja a los hermanos

¹²Guejtjo pé dí öhquijü tzü, cjuada, gui dyøjtijü cü hñø cü i pehtzi cár cargojü pü jar templo, como guegue-cü i pejpi car Cristo, eso, i nzohquijü pa gui hñøjü rá zö. ¹³Gui hñihtzibijü cja gui mađijü, porque nucú i pejpi ca Ocja. Guehquitjoguejü, guí göhtjojü, dí xihquijü, jin gui huenijü, gui hmajtijü rá zö.

¹⁴Cja gui nzojmü cü cjuada cü jin gui ne da pefi, göhtjo ür pá i mpaseatjo. Cü cjahni cü i tzi eme, pe i ntzutjo, gui johtijü, gui jñuhtibijü ür müyü. Guejti cü i eme pe jin gui nzedi, gui föxjü-cü pa da zedijü. Gui pehtzibijü ür ttijqui göhtjo cü hermano. ¹⁵Cü hermano cü i ttøhtibijü ca rá nttzo, gui ccahtzijü pa jim pé da cohtzijü ca rá nttzo. Gui xijmü da nxödi ja drí dyøhtibi ca rá zö cü pe dda cjahni, tanto quí hñohui cü xí hñeme car Jesucristo, tanto cü ddáa cü jin gui eme.

¹⁶Gui mpøjmü göhtjo ür pa. ¹⁷Gui mbenijü ca Ocja göhtjo ür tiempo, cja jin gui ma gui jiejmü ca grí orajü. ¹⁸I ne ca Ocja pa gui dyøjpiju mpøjce, masque da ncja ca te da ncja, como ya xquí bbøpju jar tzi dye car Jesucristo.

¹⁹Bbø da nzohquijü hnar hermano ca ba ja hnar palabra

ca xtrú xih car Espíritu Santo, jin da nccahtzi-ca. ²⁰Dyo guí despreciabijü cár palabra cü to di nzohquijü ncjapü. ²¹Gui dyøjmü tzü te da ma, cja gui dyøhtibijü ür prueba pa gui pađijü, ¿cja i ncjuani car palabra ca i ma, o jina? ²²Gui jiejmü göhtjo tema cosa drá nttzo.

²³Cam Tzi Tajü pü jitzi da jñujtiqui ir tzi müyü cja da möxquijü pa drá zö grí hmøpju. Dí øjpi guegue da möxquijü pa jin gui dyøtijü ca rá nttzo, cja pa da mezquijü jar tzi dye, tanto quir cuerpojü, tanto quir tzi müyü. Nubbú, da döhqijü limpio cam Tzi Jmujü Jesucristo bbø xtu eje. ²⁴Xí nzohquijü car Tzi Ta jitzi pa xí cjahqui í mejtiquijü. Guegue da mezquijü rá zö hasta ür gatzi, como i zøjte göhtjo ca i ma.

Saludos y bendición final

²⁵Nuquiguejü, cjuada, gui oraguijü tzü.

²⁶Cja gui zenguajü cor jmajte göhtjo cü hñohui, por rá nguejcoje, nugö co nür Silvano co nür Timoteo.

²⁷Nugö dí ja cam cargo ca xí ddajqui car Tzi Ta Jesús, cja dí xihquijü da jnøn nar carta-na pa da dyøde göhtjo cü hñohui cü rá bbøh pü.

²⁸Cam Tzi Jmugøjü Jesucristo da möxquiguejü co cár tzi ttijqui. Amén.